

# «Nagin motiv per esser euforic»

Il Grischun fa in gudogn dad 80 milliuns – in'intervista cun Christian Rathgeb

MARTIN CABALZAR/FMR

■ **Gievgia ha il minister da finanzas Christian Rathgeb preschentà il quint chantunal 2020. La FMR ha prendì l'ocasiun da discurre cun el davart la situaziun finanziaria actuala, las consequenzas da la pandemia e las perspectivas dal Grischun.**

*FMR: Vos avais preschentà in quint annual cun in plus dad 82 milliuns, ina facultad totala da 2,6 milliardas ed in chapital disponibil da 553 milliuns. Per il minister da finanzas in motiv da far sigls da legria?*

**Christian Rathgeb:** Jau sun satisfatg. Però quai n'è betg in motiv per daventar euforic, las sfidas actualas per cumbatter la pandemia custan.

*Ils quints serran dapi 10 onns cun resultats positivs, malgrà ch'ins ha adina budgetà in deficit. È quai ina tactica sapientiva?*

Grazia als gudogns dals ultims onns avain nus pudì realisar duas reduziuns considerablas da la taglia ed uschia augmentar l'attraktivitad dal Grischun. Il Grischun ha oz ina da las pli bassas taglias sin gudogn da l'entira Svizra. Tar Vossa dumonda: Ultra d'intgins effects spezial ed entradas supplementaras, sco p.ex. la repartiziun multipla dals gudogns da la Banca naziunala, avain nus in'administraziun che lavura cun responsabladad. Il gudogn dad 82 milliuns munta la finala be a 3,2 pertschient da las expensas. In tschert sutpassament dal budget è perquai er immanent dal sistem. En il budget 2021 avain nus dentant prendì mesiras per evitar quest effect.

*Cun tge sperditas da taglia quinta il chantun la finala en consequenza da la pandemia?*

Nus quintain cun in minus da 50 milliuns francs per l'onn 2020, che vegnan dentant a s'effectuar pir en l'onn 2021 e che nus avain gia resguardà en il budget 2021.

*L'onn passà ha il chantun pudì profiter da la distribuziun augmentada*



**Cusseglier guvernativ Christian Rathgeb quinta – causa la pandemia – il proxim onn cun sperditas da taglia da 50 milliuns.**

FOTO OLIVIA AEBLI-ITEM

*dal gudogn da la Banca naziunala e da la dividenda da giubileum da la Banca chantunala en la summa da total rodund 75 milliuns. Cun entradas extraordinarias na sa il chantun dentant strusch quintar en l'avegnir?*

La distribuziun quadrupla dal gudogn da la Banca naziunala per l'onn 2020 è effectivamain stada ina surpraisa. La cumpart al chantun Grischun ha muntà a 62 milliuns. Sin fundament d'ina convegna transitorica da dus onns cun la BN avain nus quintà er per 2021 cun medemamain 62 milliuns. A partir da 2021 profitain nus dentant – er quai è ina fitg gronda surpraisa – d'ina ulteriura convegna cun la BN che preveda fin a 6 distribuziuns per ina durada da tschintg onns.

Per l'onn 2021 pudain nus perquai quintar cun radund 92 milliuns. Quels duvrain nus sa chapescha er urgentamain per mitigiar las consequenzas da la pandemia.

*Igl è in fatg che radund la mesadad da las entradas dal chantun è dependents da contribuziuns federalas. Quant gronda è uschia in summa anc l'abiltad d'agir dal chantun?*

La dependenza da la Confederaziun è effectivamain gronda. Uschè ditg ch'ils daners da la Confederaziun na ston betg vegnir negoziads mintg'onn da nov, avain nus grondas libertads.

*Quant grondas è in summa stadas per 2020 las expensas supplementaras*

*dal chantun per surventscher la crisa da corona?*

Nus avain mess a disposiziun per l'onn 2020 tras 19 credits posteriurs 96 milliuns. Tut en tut avain nus duvrà per prestaziuns supplementaras e mesiras flancantas bun 60 milliuns.

*Per l'onn 2021 han regenza ed il Cussegl grond dentant er gia decidì ulteriurs credits?*

Dapi il cumenzament da 2021 avain nus concedì da nov diesch ulteriurs credits en l'autezza da 236 milliuns. Quels meds vegnan impundids principalmain per sustegnair l'economia en il program da cas da direzza. Nus quintain che la Confederaziun s'engaschia a moda considerabla vid quests custs. En il meglier cas pudain nus retschaiver fin 158 milliuns vi da noss program da cas da direzza. Nus vegnain a batter a Berna.

*Nua èn per Vos sco minister da finanzas las pli grondas sfidas per il tegnairchasa chantunal?*

Ultra da la pandemia avain nus da magunar ina reduziun annuala da rodund 30 milliuns en connex cun las revisiuns da las leschas da taglia, ina reduziun da fin 50 milliuns tar la nova guliavaziun naziunala l'onn 2026. En il nov program guvernamental figureschan plinavant plirs accents cun consequenzas finanzialas. p.ex. la transformaziun digitala ed il plan «Green Deal».

*Enfin lura na vegn Christian Rathgeb dentant betg pli a seser en la regenza grischuna, mabain forsa appartegnair al Parlament federal! In emprim pass vers Berna avais Vos gea gia fatg sco parsura da las regenzas chantunals.*

Per il chantun Grischun ch'è ferm dependent dals meds da la Confederaziun è effectivamain impurtant da pudair defender cun success a Berna ses interess. A mai plascha dentant mia incumbensa sco cusseglier guvernativ dal Grischun – il pli bel ed interessant uffizi dal mund. Uschia che jau vegn ad ademplir cun plaschair questa incarica e represchentar ils interess dal chantun fin l'ultim di da lavur.